

## 【篇目一】水瓶仔 李文煥原作

朋友對臺南帶來當有名个「麻豆碗粿」，食个時節愛淋合好个甜辣醬，咬落去逐口都有肉末仔同鹹卵黃，食起來異有在地風味。毋過，佢心肚个最愛，還係僇客家个傳統美食——水瓶仔。該單純又虬个口感，分佢發夢都會尋味。該係佢童年个味緒，乜係家鄉个味緒，碗肚承等个毋單淨係水瓶仔，還係時光个影跡。

風定定仔吹過熟事个巷仔，水瓶仔微微个香氣，就像時光个送信人，輕輕仔推醒牽覺个回憶。三十零年前，苗栗市个朝晨總會分一聲聲「水瓶仔哦！水瓶仔哦！」个聲喊醒。該係賣水瓶仔个阿姨嬌嬌个聲音，佢逐日會戴等笠嫲蒙等面帕，揸等兩籬淦淦个水瓶仔，行過莊頭巷尾滿哪仔去賣。佢單淨賣兩種口味个水瓶仔，一種係鹹个白水瓶仔，面頂鋪等切幼幼个快菜、蘿蔔乾同豆腐乾。另外一種係甜个水瓶仔，該係攞赤砂糖去做个，面頂麼个就無放，毋過該甜甜个味緒，顛倒係佢盡好食个口味。

其實，水瓶仔毋管係鹹个抑係甜个，一旦都係佢盡好个米食。做麼个佢會對水瓶仔恁合意呢？可能係胎教造成个，識聽阿

姆講佢大肚屎攞佢个時節，發子到當嚴重，食麼个就翻麼个，翻到連黃膽水都設出來。阿爸為著阿姆病子食毋落，一日一日瘦肉下去，愁慮到睬睬踏踏，毋知愛仰結煞正好。好得有一日，水瓶仔阿姨堵好孩擔經過喊：「水瓶仔哦！好食个水瓶仔哦！」阿爸心想：「甘願過錯，毋願錯過。水瓶仔雖然無麼个，但係有食總比無食好。」煞煞就去買咧兩碗水瓶仔，堵造化看阿姆食得落無？

麼个山珍海味都食毋落个阿姆，竟然看著水瓶仔就口涎水溶溶跌，兩下半就呷到淨淨，全全無發子个現象。該日開始，阿姆就逐日等等水瓶仔阿姨，揸來正蒸好萋萋个水瓶仔，一直食到膠佢降出來為止，故所頭擺佢還分人笑係「水瓶仔子」。

水瓶仔，毋單淨係一種食物，佢還係一段情感个載體。見擺佢食一口水瓶仔，就像係穿越時空，轉到該無愁慮个年代，轉到該阿姨个擔脣，轉到該溫情个屋下。在這個緊板个生活裡肚，水瓶仔係佢心靈个安慰，係佢記憶中永遠个甜。

## 【篇目二】走當晝 郭亭好原作

「遽遽、遽遽會赴毋掣哩！慢到會分先生責罰！」頭下還在該食飯傍「天天開心」笑到哈哈滾，哪知嘎看到過晝，這下愛做個戲齣就係「天天擔心」哩！跋起腳，日頭較烈也毋怕，走過麪l工廠、走過米麪店、幹上一板橋，走到擲氣毋上頸，直直走對學校去。好得在班長記名進前，分僇先一步腳踏入教室肚坐好，伏在桌面緊啟大氣，心肝肚恸想：「唉！若係做得帶飯包就好哩！若係屋下人做得同僇送飯包就好哩！若係屋下戴較近兜仔就好哩！僇就毋使恁緊張咧！」

逐朝晨，就會看著同學摺飯篋仔放入籠床肚，正扛去大鑊蒸；若係無帶飯包個人，毋係等人送便當來，就係愛轉屋下食晝。僇就係愛轉屋下食飯個人，當晝歇睏個鐘聲一響，無論係幾烈日、幾大雨，抑係寒到人會死，為著顧肚屎做下愛轉屋下食晝。記得該下見行出校門，看著當多來送飯篋仔分細人仔食個世大人，僇總會試尋看啊，今晡日屋下人敢會有閒好同僇送飯包來？實在還慇當，夢想該根本就係雞公生卵——無可能個事情。轉到現實，僇共樣愛跋起腳開始走，恁樣正赴得著規定轉到學校l 麪：音 pangˋ；語源於日語「パン」，麵包。

個時間。

有一擺學校個運動會，僇分同學推選去參加大隊接力比賽，比賽個銃聲響起，各班選手做下盡命牯走。排盡尾一棒個僇當緊張，過看著運動坪脣企到淦淦加油個人，阿姆哀哦！吾心臟硬硬愛對嘴項跳出來哩。班項同學本來走第一，嘎分別班個人逐過去變第四名，等到會輪著僇個時節，同學佢兜做下大聲喊：「阿庭妹，愛加油哦！慇班就靠你哩啲！」連先生也擎手同僇加油。僇接力棒一接啊著，就三步做二步飆出去。一下仔就分僇逐過一儕，續等又分僇逐過另外一個，包尾正經分僇拿著第一名咧。同學做下圍兼來大聲喊「英雄、英雄」，僇試著還風神哪！

走當晝，該當時僇當怨嘆：做麼個別儕人個爺哀做得摺細人仔送飯篋仔，僇就愛自家走轉去食？毋過打幫日日恁仔走，吾個體力、腳力做下當好，也為自家得著當多田徑金牌。因爭恁仔也分僇學著：愛用無共樣個角度去看事情，就像在較光個日頭下也會有烏影；事情做下有好壞兩面，愛多角度去思考，正做得樂觀面對人生。